



Sumáriu Kazu
Tribunál Distritál Suai
Janeiru 2021

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza :12

Artigu	Tipu Kazu	Númeru
Artigu 145 Kódigu Penál (KP) no artigu 2,3, 35 Lei Kontra Violénsia Doméstika (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família no 35 kona-ba tipu krime violénsia doméstika no artigu 36 kona ba krime sira violénsia doméstika nian hanesan krime públiku	9
Artigu 243 KP	Obstrusaun ba autoridade públika	1
Artigu 23, 172 KP	Tentativa violasaun seksuál	1
Artigu 1757, 1758, 1759, 1762, 1765, 1786, 1782, 1804, 1805 KS	Regulasaun ezersisiu poder paternál	1
Total		12

2. Totál desizaun ne'ebé JSMP monitoriza: 7

Tipu pena	Artigu	Númeru
Suspensaun ba prizaun nia ezekusaun	Artigu 68 KP	3

Pena multa	Artigu 67 KP	3
Omologa		1
Total		7

3. Total kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun: 5

B. Deskrisaun sumáriu ba desizaun kazu sira ne'ebé JSMP monitoriza

1. Krime ofensa ba integridade física simples ho natureza violéncia doméstika

Nú. Prosesu : 0018/18. CVMCT
 Kompozisaun Tribunál : Singulár
 Juis : Dr. Benjamin Barros
 Prokuradór : Dr. Napoleão Soares da Silva
 Defeza : Dr. Domingos dos Santos
 Desizaun : Pena multa US\$60.00

Iha 20 Janeiro 2021, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu JdC hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 30 Setembru 2018, iha oras tuku 07:30 dadeer, arguidu foti ai-sanak ida no baku dala ida iha lezada nia kidan parte karuk. Lezada la simu arguidu nia hahalok ne'e no lezada foti tizora atu sona arguidu maibé la konsege tanba arguidu hadau tiha tizora husi lezada no tizora ne'e kona fali iha lezada nia liman rezulta kanek no moras. Antes agresaun ne'e, arguidu haruka lezada atu halo kafé maibé lezada lakohi halo, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2(a), 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklara katak depoisde akontesimentu ne'e liutiha oras balun arguidu husu deskulpa ba lezada. Arguidu deklara mós katak arrepende ninia hahalok, foin primeiravés mai hatan iha tribunál no promete sei la repete hahalok hanesan iha futuro.

Alende ne'e, lezada kontinua konfirma faktu sira iha akuzasaun inklui konfirma arguidu nia deklarasaun katak depoisde akontesimentu ne'e liu oras balun arguidu husu deskulpa ba lezada. Lezada hatutan katak to'o agora ne'e arguidu la baku ona lezada.

Alegasaun finál

Prokuradór haktuir katak arguidu konfesa faktu sira iha akuzasaun no konfirma mós husi lezada. Tanba ne'e, konsidera arguidu nia hahalok priense elementu sira tuir artigu 145 KP no husu ba tribunál atu kondena arguidu ho pena prizaun fulan tolu suspende ba tinan ida.

Entretantu, defeza husu ba tribunál atu kondena arguidu ho pena multa tanba tetu katak arguidu konfesa faktu hotu iha akuzasaun, arrepende ninia hahalok, foin primeiravés mai hatan iha tribunál no to'o agora arguidu la baku ona lezada.

Desizaun

Depoisde avalia faktu hotu, tribunál prova katak arguidu foti ai-sanak no baku dala ida iha lezada nia kidan parte karuk, nune'e lezada foti tizora atu sona arguidu, maibé la konsege tanba arguidu hadau tiha tizora husi lezada no tizora ne'e kona fali iha lezada nia liman.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeravés mai hatan iha tribunál no promete sei la repete tan hahalok hanesan iha futuru, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron, durante loron 60. Bainhira arguidu la selu pena multa ne'e, arguidu sei kumpri iha prizaun durante loron 40 nu'udar pena alternativa.

2. Krime ofensa ba integridade física simples ho natureza violência doméstica

Nú. Prosesu	: 0010/18. CVMCT
Kompozisaun Tribunál	: Singulár
Juis	: Dr. Benjamin Barros
Prokuradór	: Dr. Napoleão Soares da Silva
Defeza	: Dr. Domingos dos Santos
Desizaun	: Pena multa US\$60.00

Iha 20 Janeiro 2021, Tribunál Distritál Suai prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JdA hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 07 Maiu 2018, iha oras tuku 09:00 dadeer, arguidu basa dala ida lezada nia kanuruk no tebe dala ida lezada nia ain-kabun parte karuk. Antes agresaun ne'e, lezada haruka mensajen ba arguidu nia *amante* katak arguidu kabennain ona. Ho nune'e, arguidu ho lezada diskute malu no mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2(a), 3(a), 35(b) no 36 LKVD.

Produsaun ba prova sira

Iha prosesu julgamentu, arguidu hili direitu nonook. Enkuantu lezada kontinua konfirma faktu sira iha akuzasaun no deklarasaun katak depoisde akontesimentu ne'e arguidu husu ona deskulpa ba lezada no arguidu la komete tan krime seluk hasoru lezada.

Alegasaun finál

Prokuradór haktuir katak mezmua arguidu hili direitu nonook maibé prokuradór konsidera arguidu provadu komete krime hasoru lezada nune'e mezmua sira di'ak malu ona maibé atu evita krime ne'e la akontese tan iha futuru, husu ba tribunál kondena arguidu ho pena prizaun fulan haat suspende ba tinan ida.

Entretantu, defeza haktuir katak iha prosesu julgamentu arguidu hili direitu nonook no lezada konfirma faktu hotu iha akuzasaun, nune'e husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia kanuruk no tebe dala ida lezada nia ain kabun parte karuk. Bazeia ba faktu provadu sira ne'e, tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loraun durante loraun 60. Bainhira arguidu la selu pena multa ne'e, arguidu sei kumpri iha prizaun durante loraun 40 nu'udar pena alternativa.

3. Krime ofensa ba integridade física simples ho natureza violénsia doméstika

Nú. Prosesu	: 0084/17. CVSUI
Kompozisaun Tribunál	: Singulár
Juis	: Dra. Patricia de Araujo. F. B. M. Xavier
Prokuradór	: Dr. Napoleão Soares da Silva
Defeza	: Dr. Domingos dos Santos
Desizaun	: Pena multa US\$45.00

Iha 22 Janeiro 2021, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MGM hasoru nia feen, iha Munisípiu Covalima.

Akuzasaun Prokuradór

Prokuradór akuza katak iha 07 Outubru 2020, iha oras tuku 13:00 meiodia, arguidu tuku dala rua iha lezada nia kanuruk, tuku dala tolu iha lezada nia hirus-matan no basa dala rua iha lezada nia hasan parte karuk. Arguidu mós tuku dala ida iha lezada nia liman parte karuk no tuku dala ida iha lezada nia liman parte loos. Antes agresoun ne'e, arguidu ho lezada diskute malu kona-ba lezada mensagen liuhusi *messenger (FB)* ba mane seluk no lezada hamoos kedas mensajen sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2(a), 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun no deklarata katak arguidu basa dala ida iha lezada nia kanuruk no tuku dala ida iha lezada nia liman parte loos maibé kona-ba faktu sira seluk arguidu deklarata katak la halo. Alende ne'e, arguidu deklarata katak iha kalan depoisde akontesimentu ne'e arguidu husu deskulpa ba lezada. Arguidu mós deklarata katak arrepende hahalok ne'e nune'e la halo ona agreasaun hasoru lezada, foin primeiravés mai hatan iha tribunál no promete sei la repete hahalok hanesan iha futuru.

Iha parte seluk, lezada kontinua konfirma faktu sira iha akuzasaun no reforsa arguidu nia deklarasaun katak iha kalan depoisde akontesimentu, arguidu husu deskulpa ba lezada no to'o agora arguidu la baku ona lezada.

Alegasaun finál

Prokuradór haktuir katak mezmu iha julgamentu arguidu nega faktu balun iha akuzasaun maibé lezada kontinua konfirma faktu hotu, nune'e konsidera arguidu provadu komete krime hasoru lezada. Bazeia ba konsiderasaun ne'e, husu ba tribunál kondena arguidu ho pena prizaun fulan tolu suspende ba tinan ida.

Enkuantu defeza husu ba tribunál atu kondena arguidu ho pena multa tanba konsidera katak arguidu konfesa faktu ne'ebé nia komete, dame malu ona ho lezada, arrepende ninia hahalok, foin primeiravés mai hatan iha tribunál no promete sei la komete tan krime hanesan iha futuru.

Desizaun

Depoisde avalia faktu hotu, tribunál prova katak arguidu tuku dala rua iha lezada nia kanuruk, tuku dala tolu iha lezada nia hirus-matan, basa dala rua iha lezada nia hasan parte karuk, tuku dala ida iha lezada nia liman parte karuk no tuku dala ida iha lezada nia liman parte loos.

Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende ona ninia hahalok nune'e la repete ninia hahalok, foin primeiravés mai hatan iha tribunál no promete sei la komete tan krime hanesan iha futuro, nune'e tribunál konklui prosesu ne'e no kondena arguidu ho pena multa US\$45.00. Pena multa ne'e arguidu sei selu US\$0,50 kada loron durante loron 90. Bainhira arguidu la selu pena multa refere, arguidu sei kumpri iha prizaun durante loron 60 nu'udar pena alternativa.

4. Krime ofensa ba integridade fízika simples ho forma violénsia doméstika

Nú. Prosesu : 0023/18. ANANV
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. José Elo
Defeza : Dr. Albino de Jesus Pereira
Desizaun : Pena prizaun fulan 6 suspende ba tinan 1

Iha 25 Janeiro 2021, Tribunál Distritál Suai liuhusi julgamentu movel iha Munisípiu Ainaro, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JC hasoru nia feen, iha Munisípiu Ainaro.

Akuzasaun Prokuradór

Prokuradór akuza katak iha 02 Setembru 2018, iha oras tuku 10:00 dadeer, arguidu basa dala rua iha lezada nia hasan parte loos no buti dala rua iha lezada nia kakorok. Aktu sira ne'e akontese tanba lezada telefone ba arguidu atu husu ba arguidu atu fó lezada ba haree nia avó mate, maibé arguidu la fó. Lezada nafatin atu ba duni nune'e arguidu fila mai uma no sira diskute malu, to'o ikus mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(a), 35 (b) no 36 LKVD.

Produsaun ba prova sira

Iha prosesu jugamentu, arguidu konfesa faktu hotu iha akuzasaun no deklara katak depoisde akontesimentu ne'e liuthi semana ida mak sira foin di'ak malu. Arguidu mós deklara katak arrepende ninia hahalok, foin primeiravés mai hatan iha tribunál no promete sei la komete tan krime hanesan iha futuro.

Alende ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun katak liutiha semana ida mak sira foin di'ak malu. Lezada mós deklarasaun katak to'o agora arguidu la halo ona agresaun hasoru lezada.

Alegasaun finál

Prokuradór konsidera arguidu provadu komete krime hasoru lezada bazeia ba konfisaun arguidu nian no konfirmasaun husi lezada. Alende ne'e, tetu katak violénsia doméstika aas tebes iha teritóriu hotu-hotu nune'e husu ba tribunál atu kondena arguidu ho pena prizaun fulan neen suspende ba tinan ida.

Entretantu, defeza haktuir katak arguidu konfesa, arrepende ninia hahalok no foin primeiravés mai hatan iha tribunál, nune'e husu ba tribunál atu kondena arguidu tuir konviksaun tribunál nian.

Desizaun

Depoizde avalia faktu sira hotu, tribunál prova katak arguidu basa dala rua iha lezada nia hasan parte loos no buti dala rua iha lezada nia kakorok. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

5. Krime ofensa ba integridade fízika simples ho natureza violénsia doméstika

Nú. Prosesu	: 0017/20. ANANV
Kompozisaun Tribunál	: Singulár
Juis	: Dr. Samuel da Costa pacheco
Prokuradór	: Dr. José Elo
Defeza	: Dr. Albino de Jesus Pereira
Desizaun	: Pena prizaun fulan 6 suspende tinan 1

Iha 25 Janeiro 2021, Tribunál Distritál Suai liuhusi julgamentu movel iha Munisípiu Ainaro, prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida CX hasoru lezada DP nu'udar nia fetu foun, iha Munisípiu Ainaro.

Akuzasaun Prokuradór

Prokuradór akuza arguida katak iha 23 Juñu 2020, iha oras tuku 11:00 dadeer, lezada ho nia la'en diskute malu hela no lezada mós tolok nia la'en, nune'e arguida foti ai naton ida no baku dala rua iha lezada nia kotuk laran rezulta moras no bubu. Lezada konsege ba halo tratamentu iha Ospital Referral Ainaro.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(c), 35 (b) no 36 LKVD.

Produsaun ba prova sira

Iha julgamentu, arguida konfesa integralmente ba faktu sira iha akuzasaun no deklarata katak arguida baku lezada atu hanorin lezada nune'e la repete tolok iha futuru tanba lezada tolok ho liafuan ne'ebé arguida la gosta rona. Arguida mós deklarata katak arrepende ninia hahalok ne'e no foin primeiravés mai hatan iha tribunál.

Alende ne'e, lezada kontinua konfirma faktu sira iha akuzasaun prokuradór nian no deklarata katak sira di'ak malu ona no nafatin hela ho arguida ne'ebé mak sustenta nesesidade uma laran nian.

Alegasaun finál

Prokuradór haktuir katak arguida provadu komete krime hasoru ninia feto foun bazeia ba konfisaun arguida nian no lezada ninia konfirmasaun, nune'e atu prevene krime hanesan iha futuru tanba lezada no arguida hela hamutuk iha uma ida, husu ba tribunál atu kondena arguida ho pena prizaun fulan neen suspende ba tinan ida.

Enkuantu defeza husu ba tribunál atu kondena arguida tuir konviksaun tribunál nian tanba konsidera arguida konfesa faktu sira, di'ak malu ona ho lezada, arrepende ninia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguida lori ai-naton ida no baku dala rua iha lezada nia kotuk laran. Bazeia ba faktu provadu sira ne'e no tetu mós sirkunstánsia atenuante sira hanesan arguida konfesa, di'ak malu ona ho lezada, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena prizaun fulan neen suspende ba tinan ida.

6. Krime ofensa ba integridade física simples ho natureza violéncia doméstika

Nú. Prosesu : 0022/20. ANANV
Kompozisaun Tribunál : Singulár
Juis : Dr. Eusébio Xavier Victor
Prokuradór : Dr. José Elo
Defeza : Dr. Albino de Jesus Pereira
Desizaun : Pena prizaun fulan 6 suspende tinan 1

Iha 25 Janeiru 2021, Tribunál Distritál Suai liuhusi julgamentu movel iha Munisípiu Ainaro, prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguida FdC hasoru nia la'en, iha Munisípiu Ainaro.

Akuzasaun Prokuradór

Prokuradór akuza katak iha 30 Agostu 2020, iha oras tuku 10:00 dadeer, arguida foti tudik no ko'a lezadu nia liman parte karuk rezulta kanek ki'ik no ran sai barak. Lezadu konsege ba halo tratamentu iha Ospital Referral Ainaro. Antes agresaun ne'e, arguida no lezadu diskute malu kona-ba sasan kioske nian ne'ebé arguida hola iha Dili. Iha

diskusaun ne'e arguida ko'alia liafuan ne'ebé ladi'ak ba lezadu, nune'e lezadu tuda tiha kopu ida no kopu nia rahun kona iha arguida nia ain rezulta kanek. Ho nune'e, arguida halo agresan ne'e hasoru lezadu.

Prokuradór akuza arguida kontra artigu 145 KP kona-ba ofensa ba integridade física simples ho moldura penál to'o tinan 3 prizaun ka multa, konjuga ho artigu 2, 3(a), 35 (a) no 36 LKVD.

Produsaun ba prova sira

Iha prosesu julgamentu, arguida konfesa faktu hotu iha akuzasaun no deklarata katak arrepende nia hahalok ne'e. Arguida mós deklarata katak foin primeiravés mai hatan iha tribunál no promete ba tribunál katak sei la komete tan krime hasoru lezadu no ema seluk iha futuru. Arguida hatutan katak depoisde akontesimentu ne'e sira di'ak malu to'o agora.

Alende ne'e, lezadu kontinua konfirma faktu sira iha akuzasaun no deklarata mós katak depoisde akontesimentu ne'e sira di'ak malu to'o ohin loron no la akontese tan agresan.

Alegasaun finál

Prokuradór haktuir katak arguida provadu foti tudik ida no ko'a lezadu nia liman, tanba ne'e mezmú sira di'ak malu ona, maibé atu evita krime ne'e la bele akontese tan iha sira nia uma laran, husu ba tribunál kondena arguida ho pena prizaun fulan neen suspende ba tinan ida.

Enkuantu defeza haktuir katak arguidu konfesa faktu hotu iha akuzasaun, arrepende ninia hahalok no foin primeiravés mai hatan iha tribunál. Tanba ne'e, husu ba tribunál atu kondena arguida tuir konviksaun tribunál nian.

Desizaun

Depoisde avalia faktu hotu ne'ebé prodús durante julgamentu, tribunál prova katak arguida ko'a lezadu nia liman parte karuk ho tudik. Bazeia ba faktu provadu sira ne'e no tetu mós sirkunstánsia atenuante sira hanesan arguida konfesa faktu sira, arrepende ninia hahalok, di'ak malu ona ho lezadu no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena prizaun fulan neen suspende ba tinan ida.

7. Kazu sivíl regulasaun ba ezersísiu podér paternál

Nú. Prosesu	: 0115/20. CVTDS
Kompozisaun Tribunál	: Singulár
Juis	: Dra. Patricia de Araujo Fatima Barreto Magno Xavier
Prokuradór	: Dr. José Elo (representa menór)
Defeza	: Dr. Albino de Jesus Pereira
Desizaun	: Omologa dezisténsia keixa

Iha 25 Janeiro 2021, Tribunál Distritál Suai liuhusi julgamentu movel iha Munisípiu Ainaro, prezide julgamentu tentativa konsiliaun ba kazu regulasaun ezersísiu podér paternál ne'ebé envolve autór GGT (idade tinan 1) hasoru rekeridu DA no rekerida SA, nu'udar autór nia inan-aman, iha Munisípiu Ainaro.

Termu no fundamentu sira

Iha Setembru 2020, rekerida lori sira nia oan ba iha rekeridu nia uma maibé rekeridu nia família haree rekerida ladi'ak no konta rekerida ba ema seluk, nune'e mosu problema entre rekeridu no rekerida ikus sira tuur hamutuk rezolve maibé laiha solusaun nune'e sira tenke separa. Depoisde sira hela separadu, rekeridu la tau-matan ona ba sira nia oan no la fó mós alimentasaun ba sira nia oan ne'e. Antes akontesimentu ne'e, rekerida no rekeridu hela iha rekerida ninia inan no aman no depoisde akontesimentu ne'e rekeridu ba hela tiha ho ninia família.

Kazu ne'e relasiona ho ezersísiu podér paternál tuir artigu 1757, 1758(1), 1759, 1762, 1765, 1786, 1787(2), 1782, 1804 no 1805 KS kona-ba responsabilidade inan-aman ba menór sira.

Tentativa konsiliaun

Iha julgamentu tentativa konsiliaun ne'e, rekeridu no rekerida konkorda atu menór hela nafatin ho rekerida. Rekeridu sei fó alimentasaun ba nia oan US\$30.00 kada fulan liuhusi rekerida. Alende ne'e, konkorda mós katak iha loron Segunda to'o Sesta menór hela ho rekerida no iha loron Sabadu tuku 08:30 dadeer, rekeridu sei ba foti menór iha rekerida no sei entrega filafali menór ba rekerida iha Domingu 08:30 dadeer, nune'e mós bainhira rekeridu nia aniversáriu bele lori menór hodi celebra hamutuk ho rekeridu.

Alegasaun finál

Prokuradór representa menór no defeza husu ba tribunál atu omologa akordu ne'ebé rekeridu no rekerida konkorda hamutuk atu tau-matan ba menór.

Desizaun

Bazeia ba parte rua nia akordu kona-ba alimentasaun, hela fatin no rejime vizita nian, tribunál konklui prosesu ne'e no omologa akordu ne'e.

Atu hetan informasaun kle'an liu tan favor kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>